

# QUÆSTIO MEDICA,

*Quodlibetariis disputationibus manè discutienda in Scholis  
Medicorum, die Jovis 29 Decembris 1718.*

M. JACOBO-ANTONIO MILLET,  
Doctore Medico, Præfide.

*An χέλωςι Tritus simul & fermentationis opus?*

## I.

**C**HYLUS succus est ex alimentis paratus, à quo corpus humanum fulcitur; à quo sanguis perennitatem, partes omnes incrementum mutantur, durationem & robur. Succus nulli æquiparandus nec analogus; purus, limpidus simul & unctuosus; flexi pronus; liquidorum in corpore fons & origo; mille induens formas; secretionum omnium insigne promptuarium; salivæ, succi gastrici, lymphæ intestinalis, pancreaticæ, bilis & cæterorum liquorum larga materies; inexhaustus prospicit omnibus, licet perspiratione insensibili uberrimam sui partem indefinenter exhalat. Admirabilis Prothei natalitia inquiris? non in unâ parte, sed in pluribus querenda: sic in ore, œsophago, ventriculo, intestinis elaboratur, conficitur, absolvitur. Hæc alimentorum metamorphosis haud uni & soli primarum viarum apparatus debetur & motui; perspexeris variorum succorum ex illis secretorum naturam & usum? genuinum operationis modum assécutus es.

## II.

**D**UO concurrunt in tanto opere perficiendo, solida nempe & liquida. Miretis solidorum fabricam stupendo elaboratam artificio? os perlustres? dentes in limine figurâ & robore diversos! parietes internos buccarum, linguamque ipsam, ope musculorum ex quibus constar, recolligentem quæ exciderent conspice! canalem œsophagi sequere! illius membranas numera, fibrarum ordines evolve! ventriculi pariter figuram, situm introspicias? Quot membranis contextitur? quot fibris omnis generis variè decussatis ab orificio superiori ad inferius atque ab hoc ad illud contrariâ viâ recurrentibus comparatur? tendinosum quid cuilibet orificio inesse reperies ex coalitis eo loci fibris,

nonnullisque instar circuli hunc ambientibus. Ventriculi fundum observa rugasque ejus, & duo orificia lineis parallelis à se invicem posita? Dein dextrum flexuoso ductu in canales oblongos & tortuosos dehiscens cognomine intestinorum? hîc quæ dicuntur *gracilia serpentina* tramite in medio abdominis congregantur, dum alia quæ crassa, priora ambiunt & quasi coronant: horum omnium fibras longitudinales circularibus per intervalla sectas perpende? interiora canalis intestinalis scrutare? quot foraminibus pertusa est nervea tunica? quot opponuntur spicula parallela in cavitatibus quæ extremitates spongiolæ nervorum haud immeritò conjiciuntur sub titulo crustæ villosæ intestinorum! quot inter villos hiant ostiola, patentiora quædam; mille & mille, oculorum aciem fugientia: innumera chylum absorbentia, lactea dicta; penè infinita lympham in cavitatem exonerantia, glandulosæ texturæ, vel si mavis, continuata ab extremitate arteriarum conglobatâ serie vascula excretoria! habes nunc structuram partis; quid valeant succi allabentes paucis tene. Salivam, lympham œsophagi, succum gastricum, intestinale lympham, quin & pancreaticam ejusdem naturæ, ordinis & prosapiæ ne dubites asserere: acidum plus minusve evolutum hos redolere liquores puta; nec falleris horum conditione & usu. Bilem unicè amaram alkali satis acris consortio gaudere & frui sapore exploratur.

## III.

**E**X istis intelligitur quid tritus cum fermentatione valeat in mutatione alimentorum. Operationes dixeris varias, attamen in unum conspirant; neque hæc officit alteri. Partium descriptarum situs, ordo, connexio hunc innunt morum quo assumpta premuntur, dividuntur, conteruntur, & à se invicem mixti particule dissociantur: sic subactæ, salium aculeis aditus præbent faciliores. Natura nihil molitur ineptè. Dentium summa utilitas, quantiunt duriora, divellunt, discerpunt. œsophagus ut manus, premit & promovet quæ committuntur undulatum, non tumultuosè. Ventriculus delapsa volvit, revolvit, amplectitur, comprimit; sicque partes integrantes nudo caractere præparat ac subjicit. Dein intestinalis tubulus lapsa è ventriculo per mille ambages & recessus deducit & quasi verberibus elutrit in canales hiantes, partes chyli numeris omnibus absoluti: nec minùs fermentationem sapiunt qui in cavitatibus primarum viarum perpetuò scaturiunt succi. Jam saliva massam alimentorum imbuendo turgescientiam quandam in bolis mollioribus excitat. Deglutita materies per canalem œsophagi deferitur, ubi infiniti lymphæ rivuli quaquaversum fundentes, uberiores sui proventum largiuntur ad alimentorum penetrationem, partium variarum separationem & solutionem, unde gradatim & per vices attingunt ventriculum priùs tritæ, irroratæ & fermento imbutæ. In illo succus gastricus, ope motûs membranarum visceris, partes denudatas & integrantes adoritur, penetrat, dividit; partes essentielles extrahit. Tunc chylus dictus, cum residuo mixtus, similis cremoris hordei in intestinum duodenum propellitur; ubi à bile & succo pancreatico iterùm atque de novo fermentatur, diluitur & per cætera

è gracilibus intestina delabens & ab uberiore lymphâ depuratus, lacteus cogitur intrare vasâ hinc inde aperta per modum secretionis.

## I V.

**N**EC repugnat motui partium, quam intelligimus fermentatio; & vice versâ: exulent fermentationum vulgarium analogismi. Nihil est in corpore quod operationes chymicas odorari velit, vel tantisper imitari: extorquet vi & tumultu è mixtis, quod supponit artifex: perfectiùs & placidiùs huic primæ vitæ functioni invigilat natura: non menstruorum vario delectu, non magnâ potentiâ in partes vel resinôsas, vel pinguedinosas, vel fibrosas, vel alias cujuscumque sint generis insurgit. Habet de divite fundo enatam lympham, ubique sui similem, maximæ energiæ intentionibus quibuscumque providentem. Quod partium motu dispositum fuerat, appropriata lymphâ hujus subit intima, & solutâ particularum omnium compage, principia sincera eliduntur, seu partes essentielles, sine conflictu. Motus ille intestinalis, quem vocant fermentationis, tritum non destruit. Ambo mutationem alimentorum prosequuntur & moliantur; solida motu suo præparant, liquida complent, hæc insensibiliter. Pro diversâ utrorumque texturâ diversimodè tractant alimenta: prima conterendo, altera imbuendo & solvendo. Ut cuneus, lymphâ in poros introducit; sic, ut malleus, motus partium inservit operi; utrumque conficit digestionis opus. Ita lymphâ sine motu partium jaceret iners; sic tritus absque menstrui virtute incassum adhiberetur. Menstruum dico lympham omnem primarum viarum, salibus sat idoneis præditam, ut partes alimentorum essentielles penetraret. Insensibilis est illa fermentatio, naturalis quippè, mitis, blanda & succo lacteo, chylo dicto, conficiendo accommodata.

## V.

**I**GITUR principium nutritivum in homine pender à tritu & fermentatione. Chylus est, qui per iteratam subactionem purus, dulcis & insipidus sanguini redditur, usui œconomix destinatus. Frustrâ hucusque causam digestionis prætexerunt Medici: longè à metâ distantes adhuc videas. Willisii, Helmontii & aliorum hujus doctrinæ virorum opinio nimium Chymicorum labores redolet: velut in vase æneo decertabant in ventriculo salia diversi generis & in sese graviter insurgebant, confusè materiem digestionis agitando. Hoc à naturæ simplicitate & mechanismo alienum censetur. Quorsum tot partium differentiarum? tot fibræ contractiles & elasticæ quibus decorantur? tot membrana quæ adornantur, compinguntur? Quis sanæ mentis reputet hæc omnia comparata fuisse, instituta, ut campus eligeretur, ubi præliarentur fermentationis pugiles? Moventur certè solida ut alimenta conterantur, & his in chylum conversis nutritio absolvatur. Nec qui tritus solâ potentiâ rem conficiunt, aut confici volunt geometrico more, de naturæ industriâ strictiùs opinantur: cui bono enormis lymphæ primarum viarum proventus, si unicè ad partium tritarum irrigationem, lotionemque succi secernerentur? altiùs sapit mater provida: nec nisi quodam sale essentiali imprægnatos constituit, quo allaborarent simul cum motu partium in negotio digestionis ali-

mentorū conficiendo. Sint' ergo tritus & fermentatio æterno fœdere juncta ; & in œconomiz animalis operationibus exequendis, præsertim in chylo elaborando, & perficiendo tantum valeant, quantum fermentatio chymicorum & tritus seorsim à sectatoribus collaudata fuere : sic amabili concordiz & veritatis connubio maneat fixa, rata conclusio.

*Ergo χύλωσις tritūs simul & fermentationis opus.*

## DOMINI DOCTORES DISPUTATURI.

*M. Joan. Bapt. Thomas*  
*Marinong.*

*M. Joan. Henricus Imbert,*  
*è Regiâ Scientiarum*  
*Academiâ.*

*M. Franciscus Pouffe,*  
*Scholarum Professor.*

*M. Thomas - Bernardus*  
*Bertrand.*

*M. Egidius Adam.*

*M. Camillus Falconet,*  
*Regiz utriusque Aula*  
*Equestris Medicus or-*  
*dinaris.*

*M. Joannes Gelly.*

*M. Claudius Burlet, Re-*  
*gia Scientiarum Acade-*  
*miz Socius, & Hispa-*  
*niarum Regis olim Ar-*  
*chiater.*

*M. Alexander - Petrus*  
*Mattot.*

Proponebat Parisiis GUILLELMUS DE MAGNY, Parisinus Bacca-  
laureus Medicus, A. R. S. H. 1718, à sextâ ad meridiem.